



SURUHANJAYA PILIHAN RAYA MALAYSIA

## KENYATAAN MEDIA

BIL. 97 / 2019

### **URUSAN PILIHAN RAYA KECIL (PRK) PARLIMEN P.176 KIMANIS, SABAH**

1. Suruhanjaya Pilihan Raya Malaysia (SPR) pada 9 Disember 2019 telah menerima Perakuan daripada Mahkamah Persekutuan mengenai pengisytiharan bahawa keputusan pilihan raya bagi kerusi Parlimen P.176 Kimanis, Sabah yang diadakan pada 9 Mei 2018 adalah tidak sah dan terbatal.
2. Sehubungan dengan itu, SPR juga telah membuat pemakluman rasmi kepada Speaker Dewan Rakyat, Yang Berhormat Tan Sri Dato' Mohamad Ariff Bin Md. Yusof pada 9 Disember 2019 berhubung dengan kekosongan luar jangka kerusi Parlimen tersebut.
3. Selaras dengan Perkara 54(1) Perlembagaan Persekutuan, SPR akan mengadakan satu Pilihan Raya Kecil (PRK) bagi mengisi kekosongan kerusi tersebut dalam tempoh 60 hari dari tarikh kekosongan yang dipastikan oleh SPR mulai pada 10 Disember 2019 bagi mengisi kekosongan di kerusi Parlimen berkenaan.

4. Bagi maksud menjalankan PRK ini, SPR telah menetapkan tarikh-tarikh penting seperti yang berikut :

**Hari Penamaan Calon : 4 Januari 2020 ( Sabtu )**

**Hari Mengundi Awal : 14 Januari 2020 ( Selasa )**

**Hari Mengundi : 18 Januari 2020 ( Sabtu )**

5. Tempoh berkempen yang ditetapkan adalah 14 hari bermula selepas pengisytiharan calon-calon yang bertanding sehingga pukul **11.59 malam, 17 Januari 2020 (Jumaat)**.

6. Bagi urusan permohonan undi pos luar negara dan dalam negara, tarikh buka dan tarikh tutup permohonan adalah seperti berikut :

**Tarikh Buka : 16 Disember 2019 ( Isnin )**

**Tarikh Tutup : 2 Januari 2020 ( Khamis )**

7. Bagi proses Pilihan Raya Kecil ini, **Pegawai Daerah Beaufort, Tuan Haji Jupari@Jupry Bin Etok** dilantik sebagai **Pegawai Pengurus Pilihan Raya Kecil Parlimen P.176 Kimanis, Sabah**. Beliau akan dibantu oleh LIMA (5) orang Penolong Pegawai Pengurus.

8. SPR juga bersetuju menubuahkan **EMPAT (4) Pasukan Penguin Kuasa Kempen Pilihan Raya (PP-KPR)** untuk memantau semua aktiviti kempen pilihan raya sepanjang tempoh rasmi berkempen. Pasukan PP-KPR ini akan dianggotai oleh wakil-wakil daripada pihak Polis, Pihak Berkuasa Tempatan (PBT) dan wakil-wakil calon yang bertanding.

9. SPR akan menggunakan **Dewan Datuk Seri Panglima Haji Mohd Dun Banir, Beaufort** sebagai **Pusat Penamaan Calon dan Pusat Penjumlahan Rasmi Undi**.
10. Untuk memudahkan proses penamaan calon, SPR menyeru kepada bakal-bakal calon yang ingin bertanding dalam PRK P.176 Kimanis agar mengisi dan membuat semakan awal pengisian borang tersebut dengan Pejabat Pegawai Pengurus atau Pejabat Pilihan Raya Negeri Sabah sebelum Hari Penamaan Calon. Selain itu bakal-bakal calon juga adalah dicadang untuk membuat pembayaran deposit lebih awal. Ini adalah bertujuan untuk memastikan semua proses penamaan calon dapat diselesaikan lebih awal dan berjalan lancar.
11. Walau bagaimanapun, adalah diingatkan bahawa Kertas Penamaan Calon yang telah lengkap diisi dan disemak oleh Pejabat Pegawai Pengurus itu hendaklah dikemukakan oleh Calon atau penyokong atau pencadangnya semasa Hari Penamaan Calon di Pusat Penamaan Calon yang telah ditetapkan oleh SPR.
12. SPR akan meneruskan penyiaran secara langsung proses-proses pilihan raya menerusi *FB Live* di laman *Facebook* SPR sebagaimana yang dilaksanakan pada PRK sebelum ini. SPR juga akan menyiaran kepada umum keputusan tidak rasmi PRK yang tertakluk kepada pengesahan melalui laman media sosial SPR, portal SPR dan juga paparan skrin di Pusat Penjumlahan Rasmi Undi.

13. Seramai **653 orang petugas** dilantik bagi mengendalikan proses PRK P.176 Kimanis. Manakala sebanyak **20 buah Pusat Mengundi** yang mengandungi kesemuanya **69 saluran** akan digunakan untuk kemudahan mengundi. PRK ini dianggarkan memerlukan peruntukan sebanyak **RM3.6 juta**.
14. **Daftar Pemilih Pilihan Raya** yang akan digunakan untuk PRK ini adalah sehingga **Suku Tahun Ketiga Tahun 2019** yang **dikemaskini sehingga 9 Disember 2019**. Daftar Pemilih tersebut mengandungi **29,664 orang pengundi** yang terdiri daripada 29,654 orang pengundi biasa, 9 orang pengundi awal dan seorang Pengundi Tidak Hadir (PTH) Luar Negara. Daftar Pemilih tersebut akan mula dijual pada **26 Disember 2019 (Khamis)**.
15. SPR akan turut menghantar **Kad Pengundi (Voter's Card)** kepada semua pengundi di Kimanis. Voter's Card ini mengandungi maklumat Pusat Mengundi, Saluran Mengundi, Nombor Bilangan Pengundi, Tarikh dan Masa Pengundian. Ia akan memudahkan pengundi untuk mengetahui maklumat pengundian mereka dan melancarkan lagi proses pada hari mengundi.
16. Mulai tarikh **26 Disember 2019 (Khamis)**, para pengundi boleh membuat **semakan Daftar Pemilih** untuk mengetahui maklumat pusat mengundi, saluran mengundi dan nombor bilangan mereka melalui laman portal SPR ([www.spr.gov.my](http://www.spr.gov.my)) atau menelefon ke talian **03-88927018** atau melalui **SMS 15888** atau melalui aplikasi **MySPR Semak**.

17. Pada PRK ini juga, SPR turut menawarkan kepada mana-mana agensi Kerajaan, Pertubuhan Bukan Kerajaan (NGO), mana-mana badan atau individu berkelayakan yang berminat untuk menjadi pemerhati pilihan raya dalam melihat perjalanan proses PRK ini bermula dari hari penamaan calon sehingga keputusan pilihan raya diumumkan. Mereka dibenarkan untuk membuat pemerhatian seperti di pusat penamaan calon, pusat mengundi, tempat pengiraan undi dan pusat penjumlahan rasmi undi serta perlu mematuhi kesemua syarat-syarat pelantikan yang telah ditetapkan oleh SPR. Permohonan untuk menjadi **Pemerhati Pilihan Raya Kecil** ini boleh dikemukakan kepada SPR melalui e-mel **pilihanrayakecil@spr.gov.my** mulai hari ini **16 Disember 2019 (Isnin)** dan tarikh tutup adalah pada **20 Disember 2019 (Jumaat)**.

18. Bagi menggalakkan pengundi supaya keluar menunaikan tanggungjawab mereka pada hari mengundi, SPR akan melaksanakan kempen `**Jom Kita Undi**` melalui pelbagai saluran media termasuk di media elektronik, media sosial, media cetak, hebahan melalui siar raya dan pemasangan kain rentang di lokasi-lokasi strategik seperti di tempat-tempat tumpuan awam, hentian bas dan lain-lain tempat yang bersesuaian.

19. SPR mensasarkan **70 peratus pengundi** akan keluar mengundi. SPR juga memohon kerjasama semua pihak termasuk pihak media dan parti-parti politik agar turut mengambil langkah untuk menyeru dan menggalakkan pengundi supaya keluar mengundi.

20. SPR juga akan meneruskan penambahbaikan seperti berikut:
- a) Menyediakan DUA (2) saluran khusus bagi pengundi yang berumur 60 tahun dan ke atas di setiap Pusat Mengundi;
  - b) Memanjangkan tempoh masa pengundian selama 30 minit dari jam 7.30 pagi hingga 5.00 petang berbanding jam 8.00 pagi pada PRU-14;
  - c) Sebanyak 10 saluran baharu ditambah bagi mengelakkan jumlah pengundi terlalu ramai di satu-satu saluran menjadikan keseluruhannya adalah 69 saluran berbanding 59 saluran pada PRU-14; DAN
  - d) Pengundi-pengundi Orang Kurang Upaya (OKU) akan mengundi di Saluran 1. Pada PRK ini seramai 329 orang pengundi OKU telah dikenal pasti dan mereka adalah berdaftar dengan Jabatan Kebajikan Masyarakat (JKM).

21. Maklumat-maklumat lain berhubung dengan pilihan raya kecil ini akan dimaklumkan dari semasa ke semasa oleh SPR.

Sekian dan terima kasih.



**DATUK AZHAR AZIZAN HARUN**  
Pengerusi  
Suruhanjaya Pilihan Raya Malaysia (SPR)  
Tarikh : 16 Disember 2019 / 19 Rabiul Akhir 1441H